

摘藻堂四庫全書薈要

集部

欽定四庫全書會要

集部

宋詩鈔卷

六十九
七十

詳校官候選知縣臣吳嗣華



欽定四庫全書薈要卷二萬三百二十二

集部

宋詩鈔卷六十九

內閣中書舍人吳之振編

陸游劔南詩鈔六

春日雜賦

羈懷病思正厭厭詩卷漁竿信手拈老境何嘗忘一笑
春風也解到窮閭殘花滿地無餘萼新筍掀泥已露尖
轉老轉窮君勿笑熊蹯魚腹豈容魚

鬢毛八九已成霜此際逢春只自傷苦雨不容花抵敵
餘寒猶賴酒禁當退紅衣焙薰香冷古錦詩囊覓句忙
堪笑散人間事業西窗容易又斜陽

唐樂府云牀上小
熏籠韶州新退紅

江湖放浪水雲人藥物枝梧夢幻身移竹南窗初試筍
埽花北陌旋成塵窮忙自笑常終日老健猶能不負春
未遂初心惟一事乞薪賒米惱吾鄰

乞得身歸剡曲邊衙門茆舍共蕭然向來誤計守書冊
此日遣愁無酒錢俗客妬閒來袞袞流年欺老去翩翩

梨花楊柳清明過且向江頭剗放顛

梅市暮歸三山

白日蠻童佩一壺壺乾時亦復村酤橫林露墪遠猶見
暮靄籠山淡欲無綠浦例憑菰作界畫橈常遣鷺前驅
此身元是滄浪客敢學高人乞鏡湖

春晚

村巷泥深晝掩門倚闌搔首一消魂花經風雨人方惜
士在江湖道更尊擘浪忽看魚對躍入雲時見鶴孤鶩

向來幸渭今安在歎息誰能起九原

雜感

早仕讒銷骨遲歸悔噬臍短衣猶掩脛窮巷固多泥婢

喜蠶三幼

鄉中謂蠶眠為幼

奴貪雨一犁衡茆明我眼刮膜謝金篦

春晚晴還雨杯深醉復醒溪添半篙綠山可一窻青藥
品隨長鏡花名記小屏閒身幸無事吟嘯送餘齡

雜題

半飽半飢窮境界知晴知雨病形骸軒昂似鶴那求料

枯槁如僧不赴齋

大免都門久栖栖
小免調官今復西
鄰家父子我所羨
泥水没膝扶畊犁

出遊歸鞍上口占

渺渺煙波飛檣去
迢迢野徑策驢還
寄懷楚水吳山外
得意唐詩晉帖間
每惜好春如我老
誰能長日伴人閒
世間自是無兼得
勛業元非造物慳

雨

曉望橫斜映水亭暮看飄灑濕簾旌不嫌平野蒼茫色
實厭空階點滴聲上策莫如常熟睡少安毋躁會當晴
且將穡事傳童稚未插秧時正好耕

初夏閒居

雲液初芻小瓮香風漪乍展北窻涼巢乾燕乳蟲供哺
花過蜂閒蜜滿房閉戶不知春已去鈔書但覺日方長
所嗟詩思年來減虛負奚奴古錦囊

川雲漠漠雨冥冥濁酒閒傾不滿瓶蠶簇尚寒憂繭薄

稻陂初滿喜秧青
王師護塞方屯甲
親詔優民已放丁
病起自憐猶健在
不須求應少微星

松棚黯黯接虛堂
埽地燒香旋置牀
密葉留花供淺酌
斷雲障日作微涼
高城薄暮聞吹角
小市豐年有戲場
白首史官閒盡歲
祇將搜句畲流光

城上朱旗夏令初
溪頭綠水蘸菰蒲
花貪結子無遺萼
燕接飛蟲正哺雛
簫鼓賽蠶人盡醉
陂塘移稻客相呼

鄉中謂備

工者為客
長安青蓋金羈馬
也有農家此樂無

啜茗清風兩腋生西竺雅具愜幽情熏衣過後篝爐冷
展卷終時嬾架橫巢燕何曾擇貧富鳴鳩元不為陰晴
但能與物俱無著小草新詩取次成

野水楓林久寄家慣將枯淡作生涯小樓有月聽吹笛
深院無風看磴茶靜岸葛巾穿蒼蔚閒拖筇杖入谿舂
平居每與兒孫說切勿人前一語誇

水邊茆屋兩三間野叟幽人日往還兩卷硬黃書老子
數峰破墨畫廬山功名會上元須福生死津頭正要頑

試說龜堂得力處向來何啻半生閒

煮酒青梅次第嘗啼鶯乳燕占年光蠶收戶戶繅絲白
麥熟村村搗麩香民有袴襦知歲樂亭無桴鼓喜時康
未嘗一事橫胸次但曲吾肱夢自長

子適調官得永平錢監待次甚遠寄詩寬其意益
將與之偕行也

黃紙起家陞任籍青衫遡闕拜恩光署衙汝勿憎銅臭
就養吾方喜飯香世事極知多倚伏人生正要小回翔

但令父子常相守
斂版扶犁味總長

梅市

沙際人家半掩扉
借炊小住不相違
水生溪面大魚躍
風定草頭雙蝶飛
竹院遊僧聞鼓集
煙畦老圃荷鋤歸
浩然物外真堪樂
回首浮生萬事非

初夏幽居

日長巷陌曬絲香
雨霽郊原割麥忙
小擔過門嘗冷粉
微風解籜看新篁
傍籬鄰婦收魚笱
叩戶村醫送藥方

欲到湖邊還嬾動悠然扶杖立斜陽

虛堂一幅接羅巾竹樹森疎夏令新
瓶竭重招麴道士牀空新聘竹夫人
寒龜不食猶能壽弊帚何施亦自珍
枕簟北窗寧有厭小山終日對嶙峋

野草幽花無歇時一窻終日對東籬
病猶獨醉雖堪笑老未全衰亦自奇
古紙硬黃臨晉帖矮牋勻碧錄唐詩
箇中疑是忘憂處問著山翁却不知

東園梅熟杏初丹老子披襟每不冠
古硯坡陀麝煤綠

小山蔥蒨石盆寒移牀剝欲眠松塢鼓柁還思泊蓼灘
未用絲毫辨差等黃塵終勝客長安

泛舟至近村茅徐兩舍勞以尊酒

小舸悠颺亦樂哉迨迨故取北村回山從樹外參差出
水自城陰曲折來樂歲共忘東作苦殘租不待急符催
舊鄰父老睽離久喚取開顏把一盃

林間書意

三三兩兩市船回水際柴門尚未開垂綠筍梢風正惡

弄黃梅子雨初來紅螺盃小傾花露紫玉池深貯麝煤
領取林間閒富貴向來誤計伴鄒枚

地僻

地僻臨湍瀨門幽長綠苔客書疑誤達僧刺媿虛來清
露蘋花坂斜陽燕子回自憐猶有恨佳日對空壘

夏末野興

半世天涯倦遠遊還鄉不減旅人愁數聲相應鳩呼雨
一片初飛葉報秋山塢風煙僧院路河梁燈火酒家樓

絕知雪髻宜簑笠分付貂蟬與黑頭

漠漠川雲闔復開天公試手挽秋回參差小市林邊出
縹緲疎鐘雨外來土塹飯香供晚餉布帘字大賣新醅
歸舟自逐輕鷗去不用城笳抵死催

劇暑

六月暑方劇喘汗不支持逃之顧無術惟望樹影移或
謂當讀書或勸把酒卮或誇作字好蕭然却炎曦或欲
溪上釣或思竹間碁亦有出下策買簟傾家貲赤脚踏

層冰此計又絕癡我獨謂不然願子少置思方今詔書
下淮汴方出師黃旗立轅門羽檄晝夜馳大將先擐甲
三軍隨指揮行伍未盡食大將不言飢渴不先飲水驟
不先告疲吾儕獨安居茂林蔭茆茨脫巾濯寒泉卧起
從其私于此尚畏熱鬼神其可欺坐客皆謂然索紙遂
成詩便覺窻几間颯颯清風吹

縱遊深山隨所遇記之

行穿犖确度谿谷路跨清溪一木斜歷盡巖危到平地

壞垣敬屋兩三家

山徑敬危細棧通孤村小店夕陽紅竹郎有廟臨江際
木客無家住菁中

道逢山客東荆薪口眼睚盱略似人試問村名瞠不語
割然長嘯上嶙峋

古寺蕭蕭不見僧飛甍滿屋老泉鳴空房終夜無燈火
斷木支門睡到明

池上

旋移吟榻竝池橫欲出柴門復嬾行樹罅忽明知月上
竹梢微動覺風生貧無醉日惟堅忍疾遇涼秋亦漸平
二尺燈檠元好在便思相伴聽蛩聲

秋後一日風雨

炎歊數日劇蕩滌及秋初病葉風吹盡鳴蟬雨打疎
涼謀社酒瘳潤理園蔬分喜寧無處蒲中鱖鱖魚

秋思

詩人本自易悲傷何況身更憂患場烏鵲成橋秋又到

梧桐滴雨夜初涼
江南江北堠雙雙
燈暗燈明更短長
安得平生會心侶
一尊相屬送年光

小病兩日而愈

病骨羸然山澤臞
故應行路笑形模
記書身大似椰子
忍事癭生如瓠壺
美酒得錢猶可致
高人折簡孰能呼
不如淨掃茅氈地
卧看微香起瓦爐

龜堂一隅開窻設榻為小憩之地

楫欄簷蔔障斜陽
旋置臨階八尺牀
小展窻扉無大費

略加苦蓋有餘涼
老來愈覺歲時速
夢裏不知途路長
試問神遊向何處
月明揮榜上瀟湘

秋懷

客思殘荷外農功晚
稻前祭多巫得職
稅足吏無權
浦溆家家釣村墟
點點煙歸舟
葛衣薄始覺是秋天

曩得治中俸湖山偶卜居
身嘗著禾譜
免解讀農書
遇事絕欣厭
接人均戚疎
乾坤雖浩浩
等付一蘧廬

秋暑雖猶在晨興氣已清
蠻童埽荒徑
獠婢滌空鑪
病

樹有凋葉殘蟬無壯聲書生守故態已復理燈檠

病卧

老境偏饒卧秋天不肯晴愁憑書解散病仗藥支撐果
熟烏烏樂村深雞犬聲邊頭定何似頗說募新兵

秋夜獨坐聞里中鼓吹聲

收盡浮雲見素娥青天脉脉映明河時平里巷吹彈鬧
歲熟人家嫁娶多高會不知清夜永散歸想見醉顏酡
小窻燈火晶熒處也有人賡七月歌

自述

早畏危機避巧丸
長安未到意先闌
心如老馬雖知路
身似鳴蛙不屬官
閒駕柴車無遠近
旋沽村酒半甜酸
羣兒何足勞情恕
胸次從初抵海寬

秋興

困儲赤米枝梧飯
篋有青氈准擬寒
政使堆金無處用
不須常貯一錢看

白頭韭美醃齏熟
頰尾魚鮮斫鱠成
却對盤飧三大息

老年一飽費經營

懲羹吹齧豈其非
亡羊補牢理所宜
白頭始訪金丹術
莫笑龜堂見事遲

放翁老矣欲何之
采藥名山更不疑
但入剡中行百里
姓名顏狀有誰知

鼉鼓華鯨響寺廊
殘蕪落葉弄秋光
寒驢繫著門前柳
閒覓題名拂敗牆

小築

小築隨高下園池皆自然
鋤山得靈藥斲坎遇寒泉
幽檻花房斂深林果蒂駢鄰翁亦好事相伴送流年

寓興

窮巷無來客秋風獨浩歌
壯年閒處老佳日病中過
甚欲攜長鏡仍思擁短簑
逢山皆可隱不必上三峩

行飯至湖上

行飯消搖日有常青鞋
又到古祠傍殘蕪滿路無多綠
落葉投空不待黃只道詩書能發冢
豈知博簿亦亡羊

此身只合都無事時向湖橋看戲場

秋晚雨中作

新雁南來歲又殘蕭蕭風雨暗江干客疎似悉爾來病
酒薄不禁如許寒草絡籬頭花尚碧樹當浦口葉初丹
醉來且擁黃紬睡莫問何時后土乾

湖村

四十來居湖上村翩翩七見改初元風梢解籜竹齊母
露葉成陰桐有孫渴鹿出林窺藥井馴鷗掠水傍棊軒

老人不用誇頑健時看孫曾浴畫盆

曉寒

悠悠殘夢伴殘更萬木風號曉氣清雞唱欲闌聞井汲
月痕漸淺覺窻明突煙騰碧炊初動衣焙推紅火已生
小閣翻書裘褐暖早朝霜滑媿公卿

南門散策

結宇溪一曲兩山左右之橫木以為門斷竹作短籬本
無剝啄客門壯固不施甃路壞莫補石罅生棘茨野蔓

不知名丹實何纍纍村童摘不訶吾亦愛吾免

十月

紅樹平沙十月天放翁今作水中仙
蓼蓼林外迎神鼓
隻隻溪頭下釣船
世事極知吾有命
俗人終與汝無緣
菊花枯盡香猶在
又付東籬一醉眠

記夢

久住人間豈自期
斷砧殘角助淒悲
征行忽入夜來夢
意氣尚如年少時
絕塞但驚天似水
流年不記髻成絲

此身死去詩猶在未必無人麤見知

旅舍

寺鐘吹動四山昏繫纜來投江上村木落不妨生意足
水歸猶有漲痕存爐紅手暖書差健鼎沸湯深酒易溫
勿為無年憂寇竊狺狺小犬護籬門

石堰村

木落山不蔽水縮洲自獻寒日晚更明村巷曲折見小
婦鳴機杼童子陳筆硯農家雖苦貧終勝異鄉縣君看

宦遊子豈無墳墓戀生死在故鄉切勿慕榮傳

幽居遣懷

習氣深知要掃除時時褊忿獨何歟呼童不應自生火
待飯未來還讀書世態詎堪閒處看俗人自與我曹疎
作詩未必能傳後要是幽懷得小摠

貧述

寒生肌粟苦衣單瘦減頭圍覺帽寬荒寂在家猶逆旅
窮空養老亦蔬餐柴青竈突騰煙細膏盡燈缸照字難

猶喜新醅三斗熟半窻梅影助清歡

自述

勃落為衣隱薜蘿掃空塵抱養天和過期未死更強健
與世不諧猶嘯歌野市蕭條殘葉滿酒家零落廢墟多
石帆山下孤舟雨借問君如此老何

幽事

老大常愁節物催東皇又挽斗杓回江天慘慘不成雪
山驛蕭蕭初見梅隱士寄雲從地肺遊僧問路上天台

戲書幽事無時闕古錦詩囊暮暮開

山房

擾擾人間歲月移山房幾度換茅茨身遊與世相忘地
詩到令人不愛時老鶴初來未丹頂穉松親種已虬枝
東塗西抹非無意皺面朱鉛太不宜

感舊

雕鞍送客雙流驛銀燭看花萬里橋三十三年真一夢
茆簷寒雨夜蕭蕭

禹祠

祠宇嵯峨接寶坊，扁舟又繫畫橋傍。
鼓添滿筍尊絲紫，蜜漬堆盤粉餌香。
團扇賣時春漸晚，夾衣換後日初長。
故人零落今何在，空弔顏垣墨數行。

見事

流光莫恨去聯翩，見事還疑勝昔年。
細改新詩須枕上，少留劇飲待花前。
陰陰竹塢安茶竈，淺淺蘋汀著釣船。
物外家風吾豈敢，散人名號亦充員。

初春幽居

滿榼芳醪手自攜，
陂湖南北埭東西。
茂林處處見松鼠，
幽圃時時聞竹雞。
零落斷雲斜日霏，
微過雨未成泥。
老民不預人間事，
但喜農疇漸可犁。

小築園林淺鑿池，
身閒隨事得遊嬉。
幽花折得露猶濕，
嘉木移來根不知。
小蝶弄晴飛不去，
珍禽喜靜語多時。
風光未忍輕拋擲，
聊付詩囊與酒卮。

春遊

梅市移舟過古城此行亦未闕逢迎負薪野老無妻子
施藥山人隱姓名風雨偏宜宿茅店鹽醢不遣到藜羹
宣和版籍今誰在似是天教樂太平

羸臥

羸臥將如老景何小園風月且婆婆茶因春困論交密
酒為家貧作態多馬上元無聽雞句原頭那有飯牛歌
自憐遠屏猶多事賣藥歸來買釣蓑

幽事

跌宕人間歲月遷賞心幽事故依然潮通支浦漁舟活
露濕繁花醉帽偏才盡賦詩愁壓倒氣衰對奕怯饒先
光陰風月空如昨悵望蘭亭被禊年

暮春新路至湖上示元敏

時雨作未成蒸溽思出門湖塘直東西行人各歸村翻
翻鳥投林杳杳鐘鳴昏羊牛爭迳路煙火出短垣吾免
望未到誰與共盤飧幽獨多惻愴且復攜斯孫歸來蓬
窻下聊可與晤言

春陰溪上小軒作

午醉初醒倚釣軒悠然無與共清言
風微僅足吹花片雨細纔能見水痕
杳杳暝鐘浮遠浦離離煙樹識孤村
故人萬里岷山下安得書來慰斷魂

此遣書問張季長消息於都下未報

自九里平水至雲門陶山歷龍瑞禹祠而歸凡四

日

細雨如絲映晚暉店家小憩換征衣
春農耕罷負犁去村社祭餘懷肉歸
黃犢自依殘照臥白鷗爭傍小灘飛

道邊舊識凋零盡誰記遼天老令威

老子無心老尚狂山程隨處寄依依雲歸岫穴初收雨
水入陂塘正下秧野客就林煨燕筍蠶家負籠采雞桑
遠遊萬里知何樂却喜東歸住故鄉

老子山行肯遽回直穿犖确上崔嵬未誇腳力如平昔
且喜眉頭得暫開廟後故梁龍化去山前遺箭鶴銜來
囊錢已盡君無笑草草猶能把一杯

輿似雞栖寄兩竿山程三月尚春寒麥苗吐穗初成實

梅子生仁已帶酸，買飯猶勝乞。播客看耕，僭學勸農官。
還家莫道虛懷袖，筍蕨隨宜亦滿盤。

點點桃花糝綠苔，入門倚杖意悠哉。數聲茶飯齋初散，
一片溪雲雨欲來。老宿龍鍾嗟獨在高松磊砢憶新栽，
世間萬事俱難料，未死重遊更幾回。

春晚即事

桑麻夾道蔽行人，桃李隨風旋作塵。煜煜紅燈迎婦擔，
鼔鼔畫鼓祭蠶神。

龍骨車鳴水入塘雨來猶可望豐穰老農愛犢行泥緩
幼婦憂蠶采葉忙

雜詠

鏡中顏狀年年改海內交朋日日疎一慟寢門生意盡

從今無復季長書

近聞張季長物故

女郎花樹新移種官長梅園亦探租作盡人間免戲事

誰知空橐一錢無

鄉人謂楊梅止曰梅官長其高品也

一日日窮窮不醒一年年老老如期黃河却有逢清日

白髮應無返黑時

早至園中

湖上空濛雨熟梅
清晨岸幘一悠哉
幽花不恨草埋沒
密樹豈知禽去來
舊為愛茶分水器
近緣炊爨得琴材
小丘僅見山如髻
尚媿韓公八尺臺

南堂晨坐

鏡湖清絕似瀟湘
晨起焚香坐草堂
日暖遊絲垂百尺
花殘新蜜釀千房
綠桑糝箔開蠶食
白水翻車浸稻秧

莫道村翁殺風景也能沽酒畲年光

雨晴

早暝常思雨沉陰却喜晴放船蓮蕩遠岸幘竹風清淮
浦戎初遯興州盜甫平為邦要持重恐復議消兵

秋晚雜興

昔遇高皇起衆材姓名曾得廁鄒枚年踰八十猶賒死
却伴鄰翁斲芋魁

老病侵凌不可當時時攬鏡自悲傷西風吹散朝來酒

依舊衰顏似葉黃

冷落秋風把酒杯
半酣直欲挽春回
今年菰菜嘗新晚
正與鱸魚一併來

閒遊所至少留得長句

垣屋參差桑竹繁
意行漫漫不知村
眼明可數遠山疊
足健直窮流水源
鷺引釣船經荻浦
牛隨牧笛入柴門
試尋高處休行李
清絕應須入夢魂

太平人物自諧嬉
及我青鞋布襪時
丁壯趁晴收早粟

比鄰結伴絡新絲
圓輦坎坎迎神社
大字翩翩賣酒旗
晤語豈無黃叔度
欲尋幽徑過牛醫

夏日雜詠

閒居自無客
况復暑如焚
百折赴溪水
數峰當戶雲
幽尋窮鹿徑
靜釣雜鷗羣
舊愛南華語
今方踐所聞

南堂雜興

新涼一夜入郊墟
晨起衣巾爽有餘
燕欲委巢雛盡去
燕有三生雛者
及秋雛方去盡
扇猶在手意先疎
題詩又滿牛腰束
采

藥常攜鴉背鋤湖上從今風月好不妨隨處命籃輿

犇走當年一念差歸休別覺是生涯茆簷喚客家常飯

竹院隨僧自在茶

紹興初僧喚客茶名隨意多
少謂之自在茶今遂成俗

禪欠徧

參寧得髓詩緣獨學不名家如今百事無能解只擬清

秋上釣槎

曉思

昏昏斷夢帶餘醒散髮披衣坐待明城角吹殘河漸隱
海氛消盡日初生老農自得當年樂癡子方爭後世名

莫怪閉門常嬾出，即今車蓋為誰傾。

秋雨書感

新春赤米摘青蔬，一飽從來不願餘。
門外久無溫卷客，架中寧有熟官書。
濁醪未廢時時飲，短髮猶須日日梳。
自笑少年風味在，滿川煙雨正愁予。

晨起開門雪滿簷，東崗一徑得幽尋。
斷雲殘雨歲華晚，丹竇碧花秋意深。
林下已悲身老病人間，猶與俗浮沉。
牀頭小甕今朝熟，又喚鄰翁共淺斟。

秋思

桑竹成陰不見門，牛羊分路各歸村。
前山雨過雲無迹，別浦潮回岸有痕。

老子齋居罷擊鮮，木盤竹筯每隨緣。
鄰僧不用分香鉢，蓮芡猶堪過半年。

秋日村舍

川雲慘慘欲成雨，宿麥蒼蒼初覆土。
芋肥一本可專車，蟹壯兩螯能敵虎。
村村婚嫁花簇檐，廟廟禱祠神降語。

兜孫力稼供賦租千年萬年報明主

秋感

扶杖龍鍾迫耄期江湖木落更堪悲
醉中光景似得志
夢裏朋儕如少時落筆龍蛇仲蒙帖
月季長詩前朝名勝凋零盡百歲關心只自知

芮國器一
字仲蒙

滿懷風

聖世優容許乞身歸來猶幸齒齊民
漁家那有懸車地
蔬食何施祝鯁人
獠婢臨溪漂衣絮
蠻童掃葉續炊薪
生涯如此仍秋暮
賴是從來慣處貧

紹興辛未至丙子六年間予年方壯每遇重九多
與一時名士登高於叢山宇泰閣距開禧丁卯
六十年憂患契濶何所不有追數同遊諸公乃
無一人在者而予猶強健慘愴不能已賦詩識
之

故里登高接雋遊即今不計幾番秋一樽尚與菊花醉
萬事不禁江水流薄命雖多死閭巷逢時亦有至公侯
若論耄歲朱顏在窮達皆當輸一籌

老健

年垂九十身猶健竹屋荆扉不厭低
挈榼自沽深巷酒擁衾遙聽別村雞
家添豚柵還堪賦路認牛欄每不迷
惟恨窮秋開霽少晚來小雨又成泥

寓歎

交世非初志謀生又絕疎
家貧思辟穀人忌悔知書
門異回軒巷藥無秃尾驢
老頑君勿怪萬事有藥除

短髮不禁搔紆悲賴濁醪
潦收溪瀨急木落寺樓高
善

飯餘何欠看雲亦足豪今朝有奇事江浦得霜螯

題僧菴

細路穿雲塢危橋渡野塘人稀土花碧屋老瓦松長憂
患雙蓬鬢裝資一布囊燒薪藉餘暖今夜有新霜

秋冬之交雜賦

嶺下晨炊黍津頭暮繫船寒潮吞別浦老木慘蒼煙市
徙新山步耕侵古廟堦間人不蓄憤散髮醉江天

霧雨林塘晚風霜聚落寒衣冠存簡朴農圃備艱難春

簸麪供餌蒸炊豆作團此心如古井無地起濤瀾

梅市暮歸

老境惟閉門不與事物接時逢佳山水尚復快登涉山
程策小蹇水泛搖短楫今茲稅駕地佳事喜稠疊雲生
濕行滕風細掠醉頰旅羹芼玉糝僧飯敷白氎葑火煨
芋魁瓦甑炊豆莢經行出幽圃懷抱頗自愜枯籬絡丹
實深澗堆黃葉白雲橫谷口綠篠穿山脇還家寧迫暮
取路羞徑捷何當倚蒲龕一坐十小劫

霜夜

月淡霜清夜漏遲
疎鐘杳杳度南陂
燈殘有恨欲誰語
雞老無聲如我衰
使入蜀川方在道
書傳淮浦定何時
若為可遣閒愁得
獨擁寒爐爇豆萁

時方附蜀中便舟寄書張季長家又

未得古壽書每闕懷

醉歌

不癡不聾不作翁
平生與世馬牛風
無才無德癡頑老
爾來對客惟稱好
相風使帆第一籌
隨風倒施更何憂

亦不求作佛亦不願封侯亦不須脫裘去換酒亦不須
賣劍來買牛甲第從渠饜梁肉貂裘本自出兜鍪燮理
陰陽豈不好纔得聞管晴雨如鶻鳩辛苦築壘拂雲祠
不如吟敲風月登高樓爾作楚舞吾齊謳身安意適死
即休

雪意

風吼江郊雪意濃雲如兩陣決雌雄山寒酒過平時量
窻黑書虧半日功閒話更端茶竈熟清詩分韻地爐紅

不須遠覓華胥路更踈天花落坐中

晚晴出行近村閒詠景物

雪雲吹盡木陰移正是先生曳杖時
老特行將新長犢空桑卧出寄生枝
醫翁暮過囊探藥筮叟晨占手布著
誰謂人間足憂患未妨古俗自熙熙

郊行

山色埽石黛江流漲麴塵春晴不終日
老病動經旬竹密有啼鳥村深多醉人
東阡與南陌處處寄閒身

開歲屢作雨不成正月二十六日夜乃得雨明日

行家圃有賦

東風吹雨破天悭行圃歸來剗解顏百草吹香蝴蝶鬧
一溪漲綠鷺鷥閒老來每歎論心少貧甚方知覓醉躑
猶賴籃輿無恙在呼兒結束入南山

園中晚飯示兒子

一飽何心慕萬鍾小園父子自相從蚍蜉布陣雨將作
蛺蝶成團春已濃澗底束薪供晚爨街頭糴米續晨春

盤餐莫恨無兼味自繞荒畦摘芥菘

書况

自從請老鏡湖濱萬事不關林下人
鴉去鴉歸還過日
花開花落又經春
官微也過千重浪
身在依然一幅巾
晨突有煙吾事了
濁醪不復惱比鄰

魯墟舟中作

春浦南來元不到
畫橈偶復入鷗羣
人家遠火林間見
船底微波枕上聞
山口正銜初出月
渡頭未散欲歸雲

錦囊詩草新寥落得句猶堪寄一放

恩封渭南伯唐詩人趙嘏為渭南尉當時謂之趙渭南後來將以予為陸渭南乎戲作長句

老向人間久倦遊君恩乞與渭川秋
虛名定作陳驚坐好句真慙趙倚樓
棧豆十年霑病馬煙波萬里著浮鷗
就封他日輕裘去應過三峰處處留

幽居

宿志在人外清心遊物初猶輕
天上福那習世間書齋

菜挑供餅槐芽采作菹朝晡雨摩腹未可笑幽居

海棠歌

我初入蜀髻未霜南充樊亭看海棠當時已謂目未覩
豈知更有碧雞坊碧雞海棠天下絕枝枝似染猩猩血
蜀姬豔粧肯讓人花前頓覺無顏色扁舟東下八千里
桃李真成僕奴爾若使海棠根可移揚州芍藥應羞死
風雨春殘杜鵑哭夜夜寒衾夢還蜀何從乞得不死方
更看千年未為足

湖上

綸巾羽扇影翩翩湖上徜徉莫計年桃李已忘疇昔分
禽魚猶結後來緣山前虛市初多筍江外人家不禁煙
莫恨幽情無與共一雙白鷺導吾前

初夏書感

春與人俱老花隨夢已空遊蜂黏落蕊輕燕接飛蟲
桑悴知蠶起牲肥賽麥豐為農當自力相戒勿怱怱

初夏喜事

箕穎元非爭奪場
瀟湘自古水雲鄉
采茶歌裏春光老
煮繭香中夏景長
斂版早知遊宦惡
署門晚悟世情常
茹芝却粒雖無術
散髮猶當效楚狂

閒遊

好事湖邊賣酒家
杖頭錢盡慣曾賒
壚邊爛醉眠經日
開過紅薇一架花

初夏雜興

終日頽然蠹簡中
門前煙水浩無窮
百年等是一枯塚

四海應無兩放翁
栗玉長枝挑苦筍
胭脂小把翦防風
地偏日永閒無事
擬著珍蔬譜一通

書興

占得溪山下數椽
飽經世故氣猶全
入門明月真堪友
滿榻清風不用錢
便死也勝千百輩
少留更過二三年
湖橋有酒能來醉
一棹何妨作水仙

池亭夏晝

造物寧非念老生
池亭幽事悉施行
羣魚聚散忽無迹

孤蝶去來如有情
小磴落茶紛雪片
寒泉得火作松聲
曲肱假寐脩然寤
不為敲門夢不成

即事

放翁老去未忘情
鏡裏森然白髮生
一片常愁見花落
三聲最怕聽猿鳴
年年雙隻路傍堠
夜夜短長城上更
晚悟一條差似可
孤舟漁火看潮平

野性

野性從來與世疎
俗塵自不到吾廬
醉中徃徃得新句

夢裏時時見異書
穉子那偷服藥酒
家僮尚護放生魚
今朝更有欣然處
引得清泉灌晚蔬

讀史

王侯到底是虛名
胡物能為我重輕
徒步出關何不可
向來常笑棄縵生

自古功名亦偶諧
胸中要使浩無涯
可憐赫赫丹陽尹
數顆檳榔尚繫懷

病戒

憂身如憂國，畏病如畏亂。此身雖幸健，敢作無事看。禍福在呼吸，恐懼兼寢飯。人所忽不省，我思嘗熟爛。夜卧不安席，晨起寧待旦。雖云親藥石，得失每參半。人情喜一快，徃徃觸剝悍。收功寧使遲，覆敗不可玩。

小築

小築竝湖隄，茅茨不厭低。引泉澆藥圃，斫竹樹雞棲。夕靄山常淡，秋蕪路欲迷。平生草玄手，老去學鉏犁。

欲雨

徙穴中庭蟻爭巢後圃鳩物情猶慮患人事得忘憂
荷鍤決新渠芟茆補舊廬共知秋必雨有備即安居

出遊暮歸

東行西行日暮歸川雲漠漠雨霏霏蝗餘場上禾收薄
酒貴街頭客醉稀買犢躬耕空自力灼龜占歲又成非
穉孫索飯殊關抱憐汝何時得瓠肥

仲秋書事

秋風社散日平西餘昨殘壺手自提賜食敢思烹細項

家庖仍禁擘團臍

昔為儀曹郎兼領膳部每蒙賜食與王公畧等食品中有羊細項甚珍子

近以惡殺
不食蟹

書生習氣盡驅除酒興詩情亦已無
底怪今朝親筆硯
村鄉來請辟蝗符

農家

大布縫袍穩乾薪起火紅薄才施畝
畝朴學教兒童羊
要高為棧雞當細織籠農家自堪樂
不是傲王公

盜息無排甲兵消不取丁頻過鬪雞
舍閒學相牛經江

浦漁歌遠人家績火青遨遊無定處隨意宿丘亭

東舍女棄龍西家婦夢熊翁誇酒重碧孫愛果初紅粟
烈三冬近團藥一笑同營生無繆巧百事仰天公

租犢耕菑地呼船取荻薪蒼頭供井臼赤脚解縫紉僧
乞銘師塏巫邀賽土神心常厭多事謝病又經旬

新作地爐成蓬窻亦自明油香麩餌脆人靜布機鳴縣
吏催科簡豪家督債輕小康何敢望生計且支撐

諸孫晚下學髻脫繞園行互笑藏鉤拙爭言鬪草羸翁

嚴責程課翁愛哺飴富貴寧期汝他年且力耕

晚秋出門戲作

病叟徜徉古澤邊橫林搖落暮秋天鳴鳩雨後却呼婦
飛雀霜前先著綿抱被每投僧榻宿卷書時當酒家錢
秋風想像芝房熟北望商山一悵然

閒愁那到野人邊萬事元知合付天盡醉僅能三盃酒
新寒未辦一銖綿鄰僧每欲分齋鉢廟史猶來索社錢
無地置錫真細事不妨胸次日超然

示子適

我初學詩日但欲工藻繪中年始少悟漸若窺宏大怪
竒亦間出如石漱湍瀨數仞李杜牆常恨欠領會元白
纔倚門溫李真自鄙正令筆扛鼎亦未造三昧詩為六
藝一豈用資狡獪

晉人謂戲為狡
獪今閩語尚爾

汝果欲學詩工夫在

詩外

聞新雁有感

才本無多老更疎功名已負此心初鏡湖夜半聞新雁

自起吹燈讀漢書

新雁南來片影孤
冷雲深處宿菰蘆
不知湘水巴陵路
曾記漁陽上谷無

小園獨酌

橫林搖落弄微丹
深巷蕭條作小寒
秋氣已高殊可喜
老懷多感自無歡
鹿初離母斑猶淺
橘乍經霜味尚酸
小酌一卮幽興足
豈須落佩與頽冠

覽鏡

鏡中老翁誰非復少年我誦書如布穀拈出無一可又
非富貴逼棄去自不果無功博一飽有罪當萬坐老境
最堪笑作計日益左正似鳩拙巢不及蠶自裹霜寒衣
未贖瑟縮附殘火作詩數十年所得良瑣瑣弱松困蔓
纏何日見磊砢洞庭可遠遊秋風思捩柂

獨坐

博山香霧散緋緋袖手何妨靜掩扉六十年前故人盡

紹興中往還朋舊
今乃無一人在

八千里外寄書稀

自張季長下世
蜀中書問幾絕昨

朝送客桐江去今日逢僧剡縣歸欲作小詩還復嬾海鷗與我兩忘機

初冬雜詠

重陽已過二十日殘菊纔存三四枝對酒插花君勿笑從來不解入時宜

古壽書來言得壻東陽人到報生孫一家三處俱強健且撥閒愁近酒尊

微風颭水靴文浪薄日烘雲卵色天但恨世間閒客少

江湖底處欠漁船

老去胸中百事真
同遊無復白頭新
鵲從熟後頻分食
鹿漸馴來不避人

小江

出郭四十里
孟冬天尚和
風生帆力健
木落月明多
小市人聲散
長橋炬火過
吾生幾來往
撫枕獨悲歌

短歌行

富貴得意如登天
自計一跌理不全
晝食忘味夜費眠

渠過一日如一年春蠶得衣畊得食農功初成各休息
賣酒墟邊紛鼓笛我過一年如一日二者求兼勢安可
與我周旋寧作我春城桃李豈不妍雪澗未妨松磊砢
人生禍福難遽論廟犧烏得為孤豚君不見獵徒父子
牽黃犬歲歲秋風上蔡門

冬日排悶

地爐微火伴寒灰垂野江雲暝不開欲睡手中書自墮
半酣窗外雪初來渡頭照影聞征雁籬角吹香得早梅

佛粥春盤俱不遠
離離斗柄欲東回

湖山尋梅

鏡湖渺渺煙波白
不與人間通地脉
騎龍古仙絕火食
慣住空山齧冰雪
東皇高之置度外
正似人中巢許輩
萬木僵死我獨存
本來長生非返魂

小雪湖上尋梅時
短帽亂插皆繁枝
路人看者竊相語
此老胸中常有詩
歸來青燈耿窻扉
心鏡忽入造化機
墨池水淺筆鋒燥
笑拂吳箋作飛草

讀唐人愁詩戲作

少時喚愁作底物老境方知世有愁忘盡世間愁故在
和身忘却始應休

清愁自是詩中料向使無愁可得詩不屬僧窻孤宿夜
即還山驛旅遊時

書歎

尺椽不改結茅初薄粥猶難卒歲儲獨子解迎門外客
羸奴知護案間書深林閒數新添筍小沼時觀舊放魚

自笑從來徒步慣歸休枉道是懸車

晚步湖隄

絀裘桐帽野人裝又上湖隄步夕陽貧甚不為明日計
興來猶作少年狂殘樽倒酒無餘漑幽圃尋梅認暗香
時有行人歎頑健黑絲點破額間霜

春日雜興

小甌有米可續炊紙鳶竹馬看兒嬉但得官清吏不橫
即是村中歌舞時

出仕常騎秃尾驢歸休自駕折轅車今朝偶遇村夫子
借得齊民一卷書

更事多來見物情世間常恨太忙生花開款款寧為晚
日出遲遲却是晴

四十餘年學養生誰知所得亦平平體孱不犯寒時出
路濕常尋乾處行

攬睡禽聲曉傍簷泥人花氣午穿簾懽情老去年年薄
困思春來日日添

暮春龜堂即事

風日初和晝漏長
蕭然巾屨集茆堂
雨餘千疊暮山綠
花落一溪春水香
斷簡橫中塵委積
故人墓上草荒涼
爾來幸有寬懷處
病退牀頭減藥囊

日月無根去若馳
故園又見落花時
盃中綠酒不肯飲
鏡裏蒼顏應自知
千丈新堤湖水滿
五更殘漏角聲悲
暮年父子難乖隔
淮浦書來苦覺遲

殘年

殘年光景易駸駸
屏迹江村不厭深
新麥熟時蠶上簇
晚鶯啼處柳成陰
短檠已負觀書眼
孤劒空懷許國心
惟有雲山差可樂
杖藜誰與伴幽尋

閒詠

蕭蕭華髮映烏巾
五十年前故史臣
正使老來無老伴
未妨閒處作閒人
按行池水知增耗
點檢庭花見故新
更有菴中策勛事
投牀鼻息聒比鄰

事業無聞負聖時
滄波自照角巾欹
養成林下無窮嬾

占盡人間徹底癡
小麥繞村苗鬱鬱
柔桑滿陌椹累累
醫翁筴叟真堪友
搜索殘尊與共持

初夏

新綠陰中燕子飛
數家煙火自相依
童誇犢健浮溪過
婦閔蠶飢負葉歸
地煖小畦花永長
泥融幽徑藥苗肥
郊居樂事何勝數
一醉旗亭又典衣

山房

柴門不掩俗人稀
成就山房一段奇
木葉最宜新雨後

鳥聲更勝暮春時
家貧屢罄綠耽酒
宿習猶存為愛詩
別有一條差自慰
木苗芎茁正離離

窻下戲詠

飛來山鳥語惺惚
却是幽人半睡中
新竹成陰無彈射
不妨同向北窻風

三尺清池鏡面平
剪刀葉底戲魚行
吾曹安得如渠樂
傍渚跳波過此生

何處輕黃雙小蝶
翩翩與我共徘徊
綠陰芳草佳風月

不是花時也解來

埭西小聚

瓦盎盛蠶蛹沙斛煮麥人三家小聚落兩姓世婚姻父
老衣冠古閭閻風俗淳不應陶靖節獨號葛天民

山行過僧庵不入

垣屋參差竹塢深舊題名處嬾重尋茶壚煙起知高興
碁子聲疎識苦心淡日暉暉孤市散殘雲漠漠半川陰
長吟未斷清愁起已見橫林宿暮禽

山行

閒人日日得閒行
况值今朝小雨晴
水淺遊魚渾可數
山深藥草半無名
臨溪旋喚畧船渡
過寺初聞浴鼓聲
小醉未應風味減
滿盤青杏伴朱櫻

小酌

偶向東園把一盃
不辭團坐掃蒼苔
野花經雨自開落
山鳥穿林時去來
皂白正非天欲辨
青黃要與木為災
今年秋後猶能健
賸乞梅栽與李栽

夏日

暑雨初晴晝漏遲
江鄉樂事有誰知
村村壠麥登場後
戶戶吳蠶拆簇時

齒髮凋零奈爾何
年光暗裏易消磨
街槐正喜清陰密
巷柳還驚蠹葉多

竹根斷作眠雲枕
木癭剗成貯酒尊
怪怪竒竒非着意
自無俗物到山村

黃葛蚊厨睡欲成
高槐陰轉暑風清
倚牀奴子垂頭坐

搖手兜孫小步行

斲取溪藤便作香煉成崖蜜旋煎湯蕭然巾履茅堂上
不畏人間夏日長

舟中有賦

一枝柔艣聽咿啞炊稻來依野老家山寺日中齋鼓動
江樓風急酒旗斜綠梢嫋嫋搖新竹翠蔓離離熟早瓜
閒客去留隨所遇不知何處送棲鴉

蒸溲作雨排悶

柱礎生微潤，簾櫳轉薄陰。
蟻遷都邑改，鳩逐怨恩深。
菡萏新離水，芭蕉半展心。
掩屏惟熟睡，誰與續愁吟。

即事

煙雨淒迷晚不收，疎簾曲几寄悠悠。
一雙蛺蝶來何許，點盡青青百草頭。

小閣憑欄望遠空，天河橫貫斗牛中。
他年鼓角榆關路，馬上遙看與此同。

露坐小隱

寂寂柴門閉嫩苔門前有路走天台近秋河漢西南落
欲雨風雲東北來旋摘甘瓜青帶蔓新芻玉醴冷傳盃
亦知野外無供給且復相逢笑口開

晚興

竝簷幽鳥語瓊瓏一榻蕭然四面風客散茶甘留舌本
睡餘書味在胸中浮雲變態吾何與腐骨成塵論自公
藥欲與君談此事少須明月出溪東

疾小愈縱筆作短章

治疾如治盜要使復其常藉曰用戈矛全之寧欲傷彼
盜皆吾民亦知畏王章奈何一朝忿直欲事歐攘歐攘
雖快心少忍理則長華陀古神醫煎浣到肺腸取效雖
卓犖去死真毫芒君審欲除盜惟當法龔黃撫摩倘有
道四境皆耕桑我亦以治疾不減玉函方

病少愈偶作

蕭條白髮臥蓬廬虛讀人間萬卷書遇事始知聞道晚
抱疴方悔養生疎高門赫赫何關我薄俗紛紛莫問渠

羸疾少蘇思一出夕陽門巷駕柴車

病入秋來不可當便從此逝亦何傷百錢布被斂首足
三寸桐棺埋澗岡但恨著書終草草不嫌徂歲去堂堂
今朝生意纔絲髮便擬街頭醉放狂

湖上晚望

閒人無處破除閒待得漁舟一一還峰頂夕陽煙際水
分明六幅巨然山

九月十一日疾小間夜賦

清夜房櫺燈火微此心病起更依依空驚牀下莎蟲語
不見梁間巢燕歸蒼硯有池殘墨在白頭不櫛亂書圍
可憐未遽忘風月猶夢華觴插羽飛

病後衣巾盡覺寬挈提裘領喟然歎孤燈不焰熒熒碧
小雨無聲慘慘寒只道清心爽自退豈知非意病相干
平生最愛秋搖落惆悵今年怯倚欄

遠遊

壯年不作故山歸老去方知浪走非挂日片帆吳赤壁

嘶風疋馬蜀青衣交遊雖廣知心少香火徒勤願力微
堪笑只今成底事青燈無恙且相依

九月二十五日雞鳴前起待旦

堪笑枯腸漸畏茶夜闌坐起聽城笳爐溫自撥深培火
燈暗猶垂半結花斷夢不妨尋枕上孤愁還似客天涯
埽塵拾得殘詩藁滿紙風鴉字半斜

舟中晨起

天宇清寒病體輕煙波聊復事宵征艣橫舟尾霜如抹

犬走籬根葉有聲
蕭尹威名空赫赫
班侯智略本平平
不如歸結迎神社
長笛圍顰送此生

殘菊

殘菊一枝香未殘
夜窻拈起百回看
過時只恐難相笑
我是三朝舊史官

山墅

煙水煙林老結廬
人間用短更誰如
輦蒲穗背供危坐
小幟障燈便細書
莫欺衰病歸山墅
曾領諸儒上石渠

貞觀開元嗟已遠為君試說紹興初

秋晚幽居

吳中秋晚氣猶和疾豎其如此老何鳥語漸稀人睡美
木陰初薄夕陽多埽園日日成幽趣撫枕時時亦浩歌
車轍久空君勿歎文殊自解問維摩

遊山

一生萬里著行滕抖擻塵埃尚末能不怕語音時帶剡
敢辭生計略如僧疎梅漸動清溪曲霽雪遙看古塙層

喚起故年清絕夢數聲柔艣下巴陵

病中雜詠

身是人間一老樵城南煙水寄迢迢尋人偶到金家畷
取米時經杜浦橋小市孤村雞喔喔斷山幽谷雨蕭蕭
吾曹自養無能爾楚客應無隱可招

身似頭陀不出家杜陵歸老有桑麻茶煎小鼎初翻浪
燈應寒窻自結花殘藥漸離愁境界亂書重理淡生涯
等閒一事還超俗斷紙題詩字亂斜

示兒

死去元知萬事空，但悲不見九州同。
王師北定中原日，家祭無忘告乃翁。

宋詩鈔卷六十九

欽定四庫全書薈要卷二萬三百二十三集部

宋詩鈔卷七十

內閣中書舍人吳之振編

陳傅良止齋詩鈔

傅良字君舉居溫州瑞安縣之帆遊鄉學于永嘉
薛氏得伊洛之旨又從南軒東萊聞為學大要其名
益高為太學錄累遷至嘉王府贊讀龍樓閣問寢不
時獨切諫每以天性感悟孝宗父子後知上意弗回

遂乞歸寧宗初除中書與朱子同朝疏畱朱子為韓
侂胄所忌試學術不正遂罷去杜門居一室曰止齋
嘉泰二年復提舉江州起知泉州力辭授寶謨閣待
制尋卒于家初從薛氏自井田王制司馬法八陣圖
之屬該通委曲皆可施之實用復研精經史貫穿百
氏以斯文為己任故其詩格亦蒼勁得少陵一體云
讀范文正公神道碑有感佚事

武侯不可致元德造其廬公在衰經中乃上時政書維

時君臣定事與草昧殊出處千載同豈必名迹如行伍
拔大將寒饑得名儒推轂天下士百年用其餘生平慕
河汾未許王魏俱慙勤八司馬意獨何區區自古朋黨
論消復莽無期誰令羣疑亡韓富及有為惜哉公不見
功名止西陸

送宋國博參議江東分韻得夜字前年上幸學一
時同舍今去略盡為之悵然

南門供帳江上亭北門觴酒湖邊榭兩年出餞略可數

往往行人半同舍憶昔翠華臨璧海儒先一日爭聲價
蘇君舌掉巫峽水楊君氣奪幽并夜黃君石斫不可轉
夫子居然古彛學艾軒風流天下少獨奏咸韶無濩夏
黃梁未熟事如許白髮不生心亦怕古來賢俊多坎軻
道與世違胡足詫武皇好少臣已老孟子尊王君尚霸
嗟乎夫子幸遭時諸公衮衮皆流亞德尊不過五品薄
歲晚曾無一飭暇君恩豈必間湖海家事姑惟問桑稼
此行端可振頽俗令我短轅今欲駕

遊鼓山

鼓山聞天下一見名不空自從周職方閩在王會中登
山亦幾人興寄隨所逢騎君常惕日遷客多悲風劔川
發甌西萬阻與海通忽焉得平壤北山蠱其東我行未
及巔已見國勢雄三韓到吳會不可道里窮俯瞰南來
帆云云自朝宗曩時諸降王各撫千里封相招神銜圖
旅獻東都宮東都今何如牧馬鳴蒿蓬一春長雨霧明
日歸樊籠恣探泉石幽篝燈導歸筇

和林懿仲喜雪韻

常賜厥咎何君相疚朝夕愧莫慰羣黎淒其望三白是
心與天通昨夜平地尺簑笠在東阡耰耨在西陌忍待
明年飽欣及吾事隙海宇正無塵草木亦煥赫遙知紫
宸朝千官手加額溫綸祭龍光賀牘交馬迹銜枚懸瓠
城仗節居延澤獨擁藍關馬共飭滹沱麥更願吾君相
對此念忠赤當令挾纊溫恩意到疆場有士如有年要
豈旦日積袁安自甘寢掃軌無過客

再和前韻

冬夜苦難曉短景復易夕安得戶牖光不待東方白恍
如游化城瓊臺若干尺英華發林藪餘彩散阡陌平鋪
浩無垠吳入微有隙忍寒貪縱觀未願明曦赫柳綿著
歌茵梅片墮粧額皚然羣汙中有意欲比迹自識玉皇
家癯仙陋山澤新來學為農遭歲屢無麥穉子色恒饑
老婢脚盡赤一飭今有待喜更問瓜場歸來看牀頭瓶
粟幸餘積且以炊春醪號召已散客

除夜用前韻

又添犬馬齒常恐牛羊夕牙無數株牢髻已大半白六
朝貴人家珊瑚高數尺復有陵邑豪沃壤動連陌居然
燕巢幙忽矣駒過隙伊傅亦中壽至今名赫赫蒼苔卧
風雨曾乏斷碑額中原五十載邊騎亂禹跡誰當懶折
腰去學陶彭澤憂端壓不下中夜歌秀麥昭代豈無人
腰黃眼前赤鴻儒籌禁省壯士守邊場罷歌且杯酒澆
此懷抱積柴門剝啄響已有賀年客

再用喜雪除夕二韻寄宗簡

百年彈指頃羣動不遑夕變彼惰游者長夜浮大白豪
俠旁無人卧我樓百尺衲子縛禪靜不敢踐桑陌武夫
髀肉滿睥睨候邊隙道家求不死真火養陰赫躁人干
速化自點雷門額書生苦穿鑿竒字窮鳥迹何如吾老
農一雨犁春澤相忘與雞豚所辨纔菽麥不聞有孔子
安識由與赤紛紛舉世士肝膽自疆場老翁捧腹笑空
洞無一積有來問時事請以臆對客

送楊似之提舉湖南

昨日有客去分符今朝有客來攬轡
歲芽掇盡筍可刷送客馬知老將至
儒雅風流能有幾南宮先生無乃是
十年不復夢蓬山萬里何為隔湘水
葉公巋然地官貳顏公領袖天下士
星聯郎署尤與何次第諸公亦連茹
一時臺省舊名德十見班行已三四
可令僕馬病崔嵬獨抱蘭蓀吊憔悴
漁樵混迹山窮處故故肯臨人不記
酒半停盃問鬚髮夜闌秉燭徵文字
多時渴見痛折節

萬事要看方得意先生行矣扈甘泉請自此心扶大議
薛士昭寺丞赴衡陽守之翌日而似之吏部至初似之
與葉侍郎叔羽顏祭酒幾聖尚書郎尤延之何一之同
在館學今皆還朝故併及之

哭呂伯恭郎中舟行寄諸友

去年上溪船落日建安旄今年上溪船濡露金華草當
代能幾人胡不白髮早念昔會合時心事得傾倒倚廬
魚鼓夜聯轡雞人曉遐搜接混茫細剖入幽眇挹注隘
溟渤扶攜薄穹昊斯文何契濶之子復凋槁百年在無

窮寥廓一過鳥家人徵舊聞學者拾餘藁區區存萬一
散逸誰可保君看魯論上彭壽顏回天于今懸日月豈
必言語好儻無後來者泯沒秋毫小南浮吳蜀會北顧
關河杳懷哉各努力人物古來少

和張孟阜尋梅韻

平生拙狀物出語輒自哈久欲頌梅花恒恐累紙寫不
該羨子年少氣豪敏詩筒往往歲一來語不驚人意不
止筆力待盡千松煤我以病驥追霜隼著鞭不上嗔人

催置詩太息梅困我恨不縱斧尋條枝嗟乎孤山無人
老坡死水邊竹外誰低徊我嘗欲擬禁字體不道雪月
冰瓊瑰退藏物後獨笑傲奄有歲晚多驚猜紛紛自謂
好顏色萬彙禿立皆堪哀模將此意入詩句十年未就
梅空開君詩却怪梅不早令我內熱紅生腮強隨嶮韻
終不滿今年又恐坐看落片飛莓苔

送劉茂實宰奉新

遠別欲無寐細論誰有酒今當作劇縣君意亦樂不江

湖吏道僻歲月民勞久救之敝精神自愛終袖手要中
名甚美用意物所咎君觀蘭桂林餘茂及樵樵移根託
客土顏色非故有贈言幾滿車一字堪皓首於馬但裁
擇對越二三友諸賢在當路公論在衆口

送謝希孟歸黃巖四首

紛紛竹帛傳浩浩金石刻淪亡已無限存亦誰愛惜如
何伏羲氏文字二三畫姬孔豈不聖用以演周易

法令如牛毛斯鞅信手成簿書積丘山趙張眼愈明萬

人立下風國勢尊且榮未省三代前誰獨有此名
圭璧襲縑藉山龍飾衣裳不聞燧古初而興自虞唐毀
車崇騎射隸作篆籀藏至今人便之秦亦忽以亡

累觴以為歡班荆以為儀交際貴如此勿使至意虧頗
常怪小雅鹿鳴至魚麗賓主禮百拜六經似支離

寄題陳同甫抱膝亭

稻梁不難謀軒冕亦易得胡為抱膝翁惻惻復惻惻秋
風墮碧梧鳳鳥去無迹愁吟草際蛩兒女淚盈臆忽然

一長嘯孤響起空寂令人識雅頌一唱三歎息室廬在
路傍耕鑿在民籍行人聽笑語稚子共眠食讀書果何
罪鬚髮又半白此意太勞勞此身長抑抑抱膝且不可
出門更何適但勿問門外蓬蒿若干尺

送鮑清卿教授莆中

閩中豈不好莆中况多儒其山有丹荔其水有子魚艾
軒諸老生典則故所餘堂堂退傅門海內欲曳裾宦游
得此樂餞者酒滿車我亦勸君酒我意獨未舒嘗聞入

林獵不可背水漁背水漁尚可背時更崎嶇方今朝廷
尊紳笏日走趨官多豈勝記勢遠復易踈媒身衆所同
藉口誰不如奈何但溫飽去向天一隅平生拙自謀蓬
巷歲月除更事亦既熟畫此未必愚豈有服蒞蘭佩之
以瓊琚令人愛不見搔首空踟躕

送謝倅景英赴闕

言詩必南雅自鄙吾無譏嗟余生已晚觀人似觀詩人
情日變化往事十九非相從飾邊幅欲語懷銜羈久不

見官寺下與家人夷渡江六十年得此心目疑早從諸
公遊晚佐一郡治居嘗陳誼高動與作吏違大白浮朋
簪單車款民扉多文雖素履用拙真良規二年意綢繆
一別事渺瀰有酒公不飲贈言我何裨穆穆清廟班僉
曰尚德宜何妨着此翁衣冠皓鬚蒼

懷同舍石天民編修

山陰不得見見期在東陽東陽忽歲華欲往又阻長貽
書輒無報有便復寄將以君懶於書我豈望得當永懷

十年別動止曾莫詳君貌今何如孰與我老蒼就使白
髮同脚力誰弱強日飭米多少飲酒可幾觴尚能甘寢
耶比之昔對床媿氏亦晚景吾婦伯姊行為君過客頻
膏沐當不常有兒若干人已未勝冠裳但要能磨門勿
問鄙與臧一紙細說似慰此遙相望末乃及田舍何有
還何亡丞郡祿已厚豈不可小康憶昔夜夢君託交少
年場竦身而掀髯眸子炯炯光依然論時事悲壯淚以滂
我方閉門嬉謁至即暫忙婆婆松竹下細數秋葉黃舊

志益凋落羣書半遺忘請君勿他及却使我意傷

夷門歌送修德還闕

萬古江入海吳蜀有不通不通誰使然人自為異同昔
在李孟錢士各懷土封靜言彼何尤亦各狗所忠恭惟
宋受命三姓皆朝宗斯文已百年名世纔數公看山與
金陵奈何不相容大雅如關洛亦復互詆攻朋分文字
間禍起師友中四郊忽戎馬塵滿夷門宮往事已覆轍
後事如飄蓬一飢忘苦饑一褐忘苦冬身謀每不長王

事靡有終有客獨惻惻萬里興深衷相過話離合歷歷
繇熙豐我久世慮薄念之涕無從貧賤將安歸功名在
其逢有能用斯人可使百阻空西人不為西東人不為
東

述懷

有客盈門餼不足有書千卷兒懶讀王公勞問煬爭竈
樵牧相忘盜騎屋古來堪笑如我少生無一事能恰好
獨有居間可引年我又不然華髮蚤

送王南強赴紹興簽幕四首

詞章行天下嘉賴二百年甲科至公卿誰敢謂不然有
人妄媒孽一世所弃捐我亦欲護短諱不言幽燕汗簡
在吾後覆車在吾前

人人尊孔孟家家誦詩書未省有宇宙孰與今多儒儒
者道如砥豈其自崎嶇申以黃老廢賈以絳灌疎漢家
嘗紛紛政爾門戶殊

歷官如歷階越等多所傷奈何坳堂水持綆萬丈長誰

無斯世方乃此袖手
旁永夜淚不禁仲尼
故皇皇又聞
雖小魯乘田問牛羊

聞之浙河東見之湘
水南未歸却相送既
喜復不堪行
矣乞自便帥幕或可
參君方乘日長勉為
停朝驂我池
有螭蟹我園有黃柑

題明皇醉歸圖

騎者兩人扶不正夾
道誰知為萬乘一人
前馳一顧後
懷欲並驅無號令狩
人亦忘記鷹犬仰視
只愁天欲暝

有司刺候上起居杳莫得詳宮鑰靜鳴呼開元自英主
前鑒竟遺盈幅紙君不見漢宮圖姐已未必當年甚如
是

送范憲東叔帥潼川四首

離逾十年合合復十月離往日苦無及來日忽未知江
源與海通吳會與蜀違通固天道常違亦物理宜勿作
兒女感是中有精微

相從意氣豪相知鬢毛斑細說竟昨非淺斟始今歡每

懷吾黨多未救此世難一則琢冰雪再則紉芝蘭騷人
絕芳潔孰與風人寬

有書但遮眼有位亦養痾養痾猶近名遮眼已患多聊
復歲晏爾奈此人遠何聲光正橫空議論如懸河宜君
見別輕款曲理則那

逢人九頓首遇事三折肱誰知少為狂正復老可憎吾
今有儲粟吾昔有短檠魯論訓何如周易讀未曾言歸
又言歸兒女喚不應

聞葉正則閱藏經次其送客韻以問之

順水去吳會逆水來夔門萬古逆順舟以斗占旦昏曩
余好百家信不及魯論初亦半喜愕久之乍亡存白髮
一無成頗識委與源風停波自平却視消長痕六經夫
如何夫子手所翻恒言但桑稼怪志無鷓鴣規圓而矩
方徃徃萬巧攢諸儒各有得長短賢若干玉帛相會盟
兵車相并吞一語苟暗合羣生皆晏溫經成今幾年嘗
試以是觀此道未軻死此書未秦燔猶之斗經天於以

生蓋渾西方亦人豪國自為乾坤書來入中州坐使學者奔君豈捨從之或但遊其藩吾聞欲乘槎鑿空訪河根孰與瞻斗車把柁行江湍

憶筇杖

岷峨山下筇竹杖危者使安衰可壯秦皇漢武窮兵不可得我獨得之今丞相前年有旨還故園其冬急召朝日邊半歲馳驅數千里賴有此杖常扶顛倉皇又別脩門去私室無人謹呵護夜半雷霆下取將兒叫妻啼留

不住我聞丞相下峽時一物無有杖自隨屬當晏朝立
仗久憐我弱脛疲拗螭如今步履隨衰草十步趨趨九
步倒假如杖在欲用之山精海怪震怒亦不保君不見
杜陵桃竹歌常恐失之君山湖上之風波梓潼使君之
贈尚爾耳况自丞相還如何

水仙花

江梅丈人行歲寒固天姿蠟梅微着色標致亦背時胡
然此柔嘉支本僅自持迺以平地尺氣與松篁夷粹然

金玉相承以翠羽儀獨立萬槁中冰膠雪垂垂水仙誰
強名相宜未相知刻畫近脂粉而况山谷詩吾聞抱太
和未易形似窺當其自英華造物且霽威平生恨剛褊
未老齒髮衰掇花寘膽瓶吾今得吾師

止齋曲廊初成

但酒勝如水但花勝如草小廊曲通幽竹椽亦良好止
齋十數間足以便衰老簷低遠風露地窄易汎掃淺溪
浮薄觴短屏糊舊藁著書僅玄易過客多韋縞於中榜

退思誰其諒深抱吾思亦已晚吾退蓋更早懷哉彭澤
令仰止商山皓維淵有潛龍維岳有藏寶煌煌暮春堂
三字落穹昊昭回際南極鎮撫及東島胡然迺在斯夙
夜懼不保鬼神無世情呵護必有道

次沈儉夫求花木韻

我意何不樂我顏復何悞止齋有新畬耕犢角已繭止
齋有溪水釣席隨所便兩山夾精舍佳處迫廬峴朋來
盡名流燕坐皆勝踐頽然止齋翁心故不可轉厭書或

窺園乘興時陟巘日月之蔽虧木陰自幽顯雨露之密

疎草色自深淺翁乎一觴詠初不着姝變易老探醇駁

風騷較寬褊眠食雖甚佳病患益加勉謗篋况所招訟

鋤那能辨於焉更悟入豈但苟排遣寄言子沈子所欲

果何件葭豕來春田冥鴻脫秋獮谷蘭猶見紉月桂不

可摹慕遠失之近求多得常鮮請以壯縣才從茲益懷

卷深居勿近市隘巷莫容輦有花門擁簞無花地生蘚

嘗試玩喧寂何者是真舛舊學枉初心新功費重研何

如過止齋我亦精文選

送鄭少卿景望知建寧

屏廢誠愚分牢愁更索居若逢知己問猶解課兒書地
僻門長閉年饑菜自鉏相望無一字不是故情疎

庚子除夜有懷

老盆自酌共誰歌歎息其如此夜何已覺二毛嗔婦問
可堪一飭患兒多關河滿眼風塵在天地藏身歲月過
事業文章吾所畏東陽人亦卧巖阿

送德遠弟赴省

科名雖細事文字要新功
方拙存家學豐腴與衆同
江湖多我友臺省半諸公
為道貧非病連簷有芥菘

聞沈元誠歸自臨漳喜而奉寄

荔圃班班熟蠔房箇箇肥
我雖緣此誤公亦為何歸
吏事生衣垢家山減帶圍
不無華袞字卿月更光輝

和張孟阜歲旦韻

白髮朝看鏡青燈夜數更
文章翰善宦名字誤浮生
廢

學兒鼾睡安貧婦饑耕從今定逢吉吾已卜先庚

天台王子木解官長樂見訪

夜深擘荔真愁絕春淺傳柑更惘然
世事愛來欺兩鬢
人生堪得別多年琢冰積雪江湖阻
樹羽崇牙日月懸
此理蒼茫君勿問明朝且莫刺歸船

月夜書懷二首

送客門初掩收書室更虛新篁高過瓦
涼月下臨除婦
病纔扶杖兒饒或饋魚今朝吾已過
莫問夜何如

道德吾何敢功名代有人
倉黃恒畏咎班白揔憂貧
細字書全廢深杯酒勿親
靜言空自愛萬古亦泯泯

題仙巖梅雨潭

衮衮羣山俱入海堂堂背水若重圍
怒號懸瀑從天下傑立蒼崖夾道陳
晉宋至今堪屈指東南如此豈無人
結廬作對吾何敢聊向樵漁寄此身

題金嶽趙園

脈脈循簷水林林夾岸山
令兒從竹下領客入雲間
稠

木容人過懸崖着手攀從今名字出不到徑苔班

用前韻招蕃叟弟

細看物理愁如海遙想朋從眼欲花逆水魚兒衝斷岸
貪泥燕子墮危沙百年喬木參天上一昔平蕪著處佳

行樂不妨隨邂逅我無官守似蜺蛙

蛙通
作鼃

落花風雨奈愁何愁亦不應緣落花尚可流觴追曲水

底須占鵬似長沙

孟夏
事

無人晤語鳥烏樂為我食貧葦

筍佳休說關河無限恨腹非空怒道旁蛙

乙巳歲首寄彭子復徐子直

又過一年空草草尋思萬事太勞勞
歲煩士友愁薪米日見兒童嘆髻毛
亂卉各隨分寸長新禽已變兩三號
及時君亦圖良集莫待春深水一篙

和丁少詹韻

盡日支頤聽雨聲閒中惟得自知明
朋來何敢煩公等老去方慚負此名
待欲短檠看少作敢將尺牘論交情
區區却望從容意要莫令人一座傾

明月隋珠忽墮前坐令衰颯意飄然無端太史頭搶地
安得揚雄賦上天前輩門墻餘幾在他時竹帛竟誰傳
落花流水君愁不南渡于今六十年

和沈守持要觀潮閣留題

平生欲賦觀潮閣立盡斜陽倦復還一日江山蒙筆力
百年名字滿人寰郡從晉宋風流後詩到蘇黃伯仲間
向去摩挲看石刻誰知功在十年間

公閒居
十年

奉陪王德修登觀潮閣兼呈邑宰劉伯協

觀潮閣在東溟上有客來登自華陽不道雪山通老栢
却看朝日上扶桑勝游氣合南三郡荆楊益也妙畫家
傳晉二王後會不知誰與繼爾江吾海永相望

桂陽勸農

雨耨風耕病汝多誰將一一手摩挲幸因奉令來循壟
恨不分勞去荷蓑涼德未知年熟不微官其奈月椿何
殷勤父老曾無補待放腰鑷與醉歌

題范秀才萬卷堂

雅尚時相背幽棲我數過兒應看客慣田孰與書多自
折唐柳縣誰聯漢甲科儒門今有此天意定如何

楊伯子以其尊人誠齋南海集為贈以詩奉酬

得與門墻最不遲白頭方誦嶺南詩文從嘉祐今三變
人在廬陵此一時細數儒先能幾見獨憐歲晚欲何之
瀟湘直下長江去得望蓬萊却更疑

潭帥潘德廊生辰

洛南添得黑髭歸歸與相忘草木知嶽麓沈沈秋柝靜

湘波穆穆夜帆遲
人間公論今何在
柱下家聲此不疑
德廊乃子賤
舍人之姪但欲公年如衛武
為留淇澳變風詩

寄陳同甫

古來材大難為用
納納乾坤着幾人
但把鷄豚燕同社
莫將鵝鴨惱比隣
世非文字將安托
身與兒孫竟孰親
一語解紛吾豈敢
祇應行道亦酸辛

送辛卿幼安帥閩

長才自昔恨平時
三入脩門兩鬢絲
瓮下可能長夜飲

花間却學晚唐詞
潛然北顧關河水
簡在西清日月遲
乘鴈雙鳧滄海上
與君從此恐差池

送盧郎中國華赴閩憲

相望千里馬牛風
聯事湖湘各已翁
造次便呼兒女見
綢繆略與弟兄同
百年又是梅花發
萬事何如荔子紅
欲附使輶嗟不及
却憐身在俊躔中

送范大著文叔知彭州

中書世祿今無幾
唐鑑家聲世不多
安得有人賢若此

忽聞去國意如何同朝最是頭先白
知己還愁語太苛
盡欲讀書三萬卷蓬萊未必似岷峨

同游張園酒中各嘆明年未知誰與此會
余最衰
病宜去因作詩識之

春過新烟能有幾愁生飛絮轉難禁
可憐衰白隨年少
愛看殘紅到夜深一輩衣冠方事事故園松竹已陰陰
明年此會知誰共雁蕩山前寄好音

送曾繼先赴山陰路鈐

鬚髯白盡猶強飭髀肉添多未跨鞍不向風沙親矢石
却來橋塚護衣冠歸舟自此長相背薦墨于今尚未乾
只恐燕然他日事獨無名字可同刊

泊釣臺灘下

今歲僅餘今夜月此舟三泊此江沂遭逢明主還遺恨
慚愧先生獨見幾泗水列侯多不免湘山四皓竟安歸
漢家故舊嘗枚數孰與東南一釣磯

除夕宿處州天寧寺

人言老去不如初我愛初心老轉無懶向門前題鬱壘
喜從人後飲屠蘇杯盤甚簡眠湏早禮數多寬拜要扶
况復勦勦僧紙帳鷄人不聽禁庭呼

再寄蔣仲可用前韻

幸無骨相可封侯歸理先人舊釣遊山下剩栽諸本竹
水邊湏着數間樓羣書可讀自隨喜一客不來誰與愁
時把釣絲銷永日魚兒亦得兩三頭

重陽日寄瑞安劉宰劉宰以是日宴新第人併見

招不及赴

落帽沾衣總失真，追隨萸菊亦勞神。
酒無肴核依然好，家有溪山豈是貧。
沆瀣從空來夜氣，青冥隨處際秋旻。
不知此是登高否，為問慈恩塔上人。

和林宗易菊花韻

一歲所餘秋有幾，重陽偏與老相催。
每憐白髮能長健，雖愛黃花亦懶栽。
好景游從須好友，新詩風味似新醅。
人生適意無過此，恣聽東籬早晏開。

春日和林宗易韻

白與紅兼盡落梅小園獨步日千迴
浮空曉色臨無際
排闥春光撥不開
學語新禽更後囀
鋪茸細草雨邊來
却憐追逐今無力
放下簾鉤就麝煤

和徐叔子用林宗易韻見示

相過風雨獨何歟
校酒論文已不如
方信深交相戀媿
却因衰退更躊躇
吟生池草書成束
飲落簷花醉墮車
明日待隨公等去
我頭應始自今梳

游雲頂院和徐叔子韻

老大生憎兒女態更無春怨與秋悲
略將盃酌隨宜具
剩有溪山取次嬉
愛客不妨兼汎汎
論文何苦太竒竒
况曾窺得尊生術
通昔蒲團日一炊

村居二首

業已將身落耦耕
時於觀物悟浮生
擇栖未定鳥離立
避礙已通魚並行
野老窺巢占太歲
牧兒敲角報殘更
絕勝倚市看郵置
客至還無菜甲羹

野衣農圃雜華髮弟兄同佚老便居僻貪閒喜命窮
習成杯酌少脫落語言工危坐看流景新萌又落紅

沈仲一送菊自言封殖之勞欲得詩為報為賦三

絕

東籬何在菊年年菊視陶詩竟孰賢未必緣詩花更好
花將詩與萬人傳

霜螯風味小槽春新樣宮衣試麩塵

見周禮
麩衣注

一段秋光

誰領此芙蓉凡子桂陳人

愁乾手自搭連筒苦雨丁丁杙小蓬
乞得花開急催客
明朝恐已著霜紅

立春

千官勒馬謝幡勝萬國鞭牛占雨晴
誰據槁梧相近午
頰車徐轉鼻無聲

和張端士初夏

屈原賈誼陶淵明文辭皆喜道孟夏而悲樂不同
雖所遭之時異要亦懷抱使然耳端士寄夏日一首若

無聊然因和其韻頌初夏之美以解之

綠陰四合水迷津
春去雖愁却可人
無數飛螢窺案帙
有時乳燕落梁塵
滿塘荷蔭將還舊
試火包香又斬新
短夜得眠常不足
僧鐘遮莫報昏晨

止齋即事二首

性已耐岑寂
老應忘隱憂
齊年雙白髮
盡日一蒼頭
竹閉緘門鑰
蒲團數漏籌
未知庭廡下
還有雀羅不
教子時開卷
逢人強整襟
再貧看晚節
多病得初心
地

僻菱蓮好山底竹樹深寄聲同燕社明月又秋砧

巳未上巳清明

霖霖故作落花天佳節重重倍悵然雖有庭除臨曲水
更無尊俎試新烟醑醪雅欲延春賞杜宇還能破晝眠
賴得二昆同一客蕨芽蒲笋短檠邊

和林宗易上巳韻

鼙鼙曙鼓五更初枚數何門可曳裾孰與課兒翻故紙
幾曾緣客掃精廬常饑未免時中酒多病安能強著書

自笑無才供視草徒勞身後問相如

答朱翔遠見別之作

總角相看五十年行藏殊轍各皤然
豈無子美書成束欲送相如賦上天
俗眼不寬多小謹交情何限復長篇
乘壺偶自兵厨至聊助征帆一醉眠

晚移舟塘次值風而回莘叟兄有詩次韻

經春屏跡與誰同苦雨衣篝亦自烘
方此欲為官况事依然不值世情風
蒙茸水國蒲荷蕩馥郁田家橘柚叢

最是一年行樂處翻成咄咄坐書空

廷植姪得男朱文昭寄詩於湯餅集即席和韻

喜說徐卿得二雛吾家波及亦君餘青衫手板宜從此
斷簡家藏莫付渠但欲健如黃犢走不妨錯寫弄麈書
更看湯餅頻頻供笑索梅花到歲除

挽尤延之尚書

自為師說竟誰宗每事持平屬此翁有志政須名節是
斯文非獨語言工要令舉世人材出合在前朝行輩中

安得長年留把柁後來各與一帆風

留宿江湖長子孫行藏節節耐人看及為侍從身垂老
欲試平生事轉難書就僅題前太史功成方記舊甘盤
令人長恨經綸意歷事三朝見一斑

向來諸老獨巋然羸不勝衣萬事便燈下細書批勅字
雪邊先着趁朝鞭豈應無故令身健却止功名與世傳
遺奏定留封禪藁憑誰吹送九重天

壯歲從游兩鬢霜重來函丈各堪傷那知卒業今無及

極悔論心昨未嘗相約歸期湏次第獨存病骨更淒涼
他年賴有門生記託在碑陰永不忘

挽東陽郭德誼


簪紱何能貴聲名幸自脩凡今為我友幾處與君遊翰
墨千年托松梧一夜秋令人懷昔日炯炯夢丹丘

悼楊林甫

袖手旁觀一世餘元非親物亦非疎酒邊每事如人意
燈下通宵讀我書學到莊騷纔止此生逢周漢定何如

西州相識無遺恨
獨恨無從摻子祛

宋詩鈔卷七十



總校官庶吉士臣張能照
校對官檢討臣王鍾健
騰錄監生臣王永榮